

la mostrares testimonio signado con su signo porque nos sepamos en commo cunplides nuestro mandado. La carta leyda datgela.

Dada en Toro, seellada con nuestro seello de plomo, diez dias de nouienbre, era de mill e quatroçientos e honze annos. Sancho Sanchez e Johan Alfonso, doctores, e Diego del Corral e Velasco Perez, oydores de la abdiencia del rey, la mandaron dar porque fue assy librado en la abdiencia. Yo Nicolas Gutierrez, escriuano del dicho sennor rey, la fiz escreuir. Johan Ferrandez. Diego Perez.

### CXXIII

**1373-XI-25, Toro.—Provisión real a los concejos del reino de Murcia, mandándoles dar fe a don Juan Sánchez Manuel como adelantado mayor del reino de Murcia. (A. M. M. Cart. real 1405-18, eras, folio 72v.)**

Don Enrique, por la graçia de Dios rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe, de Algezira e sennor de Molina, al conçeio e a los alcalles e alguazil e caualleros e escuderos e omnes buenos de la noble çibdat de Murçia e de todas las uillas e lugares de su regno et a qualquier o a qualesquier de vos que esta nuestra carta vieredes, salud e graçia.

Sepades que nos mandamos a don Johan Sanchez Manuel, conde de Carrion nuestro vasallo e adelantado mayor del dicho regno, que faga en esa comarca algunas cosas que cunplen a nuestro seruiçio.

Porque vos mandamos, vista esta nuestra carta, que creades al dicho conde de todo lo que vos dixiese e enbiare dezir de nuestra parte, bien asy commo sy nos mesmo vos lo dixiesemos, e los acojades en esa çibdat e villas e lugares e en cada vna dellas a el e a todos los suyos cada vez que y llegaren, et fagades por el dicho conde en todas las cosas que el vos dixere e mandare e enbiare dezir e mandar de nuestra parte que fuere nuestro seruiçio, bien asy commo sy por nos mesmo fariédse, e vayades con el doquier que vos dixiere o enbiare dezir de nuestra parte, bien asy commo fariades con el nuestro cuerpo mesmo. Et los vnos nin los otros non fagades ende al por ninguna manera so pena de la nuestra merçed e de los cuerpos e de quanto auedes.

Dada en Toro, veynte e çinco dias de nouienbre, era de mill e quatroçientos e honze annos. Nos el rey.

